

## CHIDDU CA SENTU

Chi tempu c'agghiurnau sta matina!  
Ddà fora chiovi, ci su' lampi e ventu,  
lu friddu chiusu 'n casa mi ncatina,  
'mpitratu, comu fussi un monumentu.

Però la menti vola e si rimina,  
e sugnu viggghiu cu lu sintimentu,  
chi 'mporta siddu cadì l'acquazzina  
àutri cosi chiù 'mpurtanti sentu...

Sentu l'ecu luntana di dda vuci  
ca mi strazza lu cori ntra lu pettu,  
e soffru tantu, comu 'n-Cristu 'n cruci!

Sentu disù di paci e di risettu,  
sentu ca s'astutau dda bedda luci,  
sentu ca 'un veni chiù l'arba c'aspettu!

## COMU UN PUPAZZU

Comu 'n-pupazzu di cimentu-armatu  
senza disìu e senza sentimenti,  
cu l'arma e cu lu cori a lu passatu,  
a signu ca mi scordu lu presentu,  
senza 'nteressi campu, e spissu privu  
comu si fussi 'mbarsamatu vivu.  
E sugnu rimurchiatu di la sorti  
arràssu di la vita e di la morti.  
Pi chissu nta sta 'gnuni di munnu  
pari ca sugnu propriu 'n prigiunìa  
e lu tempu ca passa nfunnu nfunnu  
pari affunciatu e mancu mi talìa.  
Chìssa, chìssa è la vita mia:  
un gridu dispiratu ca si perdi  
nta na notti senza stiddi,  
un gridu di bestia scannata  
ca propriu nuddu ascùta...  
la genti è surda e muta!  
Sulu li ciuri, quannu veni maggiu,  
allentanu li magghi a sta catina  
e pari ca mi dunanu curaggiu...  
comu lu suli sciogghi l'acquazzina  
lu jelu d''u me cori p'un mumentu  
si sciogghi e sboccia arrè ddu sintimentu  
c'havi la stissa tinnirizza di li ciuri,  
lu stissu ciàuru... e si chiama amuri!

## CRISI DI VALURI

Cu l'ali bianchi di la fantasia  
vulissi jiri a jinchimi d'amuri  
luntanu di stu munnu trarituru  
unni ch'ormai mpera la fuddìa.

Fari supra li stiddi 'u zappaturu  
pi siminari paci e puisìa,  
campari 'n-pocu comu piaci a mia:  
secunnu li cumanni d"u Signuri.

Vistu ca nterra mpera l'anarchìa,  
la vita persi tuttu lu sapuri  
e lu decoru e l'arti è fissaria.

E la morali stracanciau valuri  
e l'amicizia si persi pi via...  
si cogghi spini siminannu ciuri!

## DA SEMPI M'HAJU NTISU NICU

Da sempi haju avutu sintùri  
di silenzi accupusi  
e da sempi m'haju ntisu nicu  
sutta stu celu granni,  
troppu granni  
p'addunarisi di mia.  
Comu 'n-ciuri servaggiu  
criscivi a la campìa  
nte bordi d'i strati  
a lu straventu,  
'n menzu frattazzi e spini,  
abbivirannumi ogni tantu  
cu li mei stissi lacrimi.  
Da sempi haju addisiatu  
l'alitu di n-ala d'aceddu  
e la carizza di na farfalla.  
Da sempi haju aspittatu  
'n-apuzza ca nun vinni mai  
a sucari lu me nettaru  
pi farini meli...  
Tuttu lu me ciàuru  
lu jittavi a lu ventu  
e ora ca sugnu spampinatu  
lu sulì, ca mi detti ciàtu  
e ossigginu di vita,  
mi sta preparannu a la fauci!

Tuttu chissu è ridiculu,  
ju mi sentu ancòra virdi,  
ma lu distinu nimicu  
voli ca diventu fenu  
pi l'armali affamati,  
voli ca diventu latti  
pi quarchi nutricu, nicu,  
troppu nicu  
sutta stu celu granni,  
troppu granni  
p'addunarsi d'iddu!

## CUNFISSIONI

Signuri, ogni mumentu  
t'addumannu cunortu,  
ti chiamu a gran vuci  
e t'addumannu aiutu  
pi sciògghiri li ruppa  
di sta vita.

Ma siddu m'addumanni  
zoccu haju fattu pi l'àutri  
comu t'arrispuonu?

Si la morti m'arricògghi  
ntempu di nenti  
zoccu ti portu?

Signuri, t'accuntenti  
si vegnu cu li manu vacanti  
senza un'opira bona,  
senza ricanuscimenti?

Signuri, chissu è lu me statu:  
ncelu haju ammunziddatu  
sulu na catasta d'egoismu  
e mi sentu 'n piccatu.

Na cosa sula  
haju fattu di bonu  
ed è la me ricchezza  
e lu me orgogghiu,  
lu fruttu di st'anima scueta  
ca chiamanu pueta.

Sunnu sti virsuzzi d'oru  
ca nun mi detturu mai  
nè picciuli nè gloria  
e siddu moru,  
manco chissi ti portu...  
li làssu a la storia!

## DISIÙ DI PACI

Jittamu simenza di paci  
supra tutta sta terra;  
spinnemu palori d'amuri,  
'un pinsamu a la guerra!  
Tagghiamuni l'artigghi,  
sfardamu ssi cannuna  
ssi missili e ssi bummi:  
facemuni zappuna!  
Basta cu ss'armamentu,  
sunnù picciuli jittati:  
facemuni furmentu!  
Facemu tanti beddi furnati  
di ciaurusu pani  
pi chiddi menu furtunati:  
pi ddi fratuzzi luntani,  
pi ddi poviri figghi  
ca mòrinu di fami!



## DROGATI

Cu l'occhi sbarrachiatu  
si vivinu lu sulì  
e passanu li uri  
sunnannu paradisi 'llusorii  
e voli d'aceddi nta celi strazzati.  
Pàrinu mbambulati e nun sentinu  
lu gridu dispiratu di la matru  
ca 'ddilurata nvoca:  
figghiu...figghiu...figghiu...!  
Fàusi catini li tennu 'n prigiunia,  
chimere c'annegghianu la menti,  
vampugghi, 'n sintonia  
cu la morti!  
Cu l'occhi sbarrachiatu  
vidinu li stiddi a menzujornu,  
nsipidi orizzonti  
fàrisi sempì chiù nichì  
e celi nivuri di picì  
ca nchiummanu lu cori.  
Poviri figghi,  
sfardanu la vita a picca a picca  
parturennu sonnura smuddicati  
c'hannu sintùri di marciu.  
Prujticci na manu,  
tiratili a lu scogghiu di la vita,  
hannu bisognu di 'n-còcciu d'amuri,  
nun lassatili sulì...!  
Ntantu, nchiuvatu 'n cruci  
supra lu Carvariu Cristu chianci  
l'urtima lacrima pi la so sarvizza!

... E L'EMIGRANTI PARTUNU

Naseru, comu vosi lu Signuri,  
unni lu suli sempì fuculia,  
unni c'è sempì ciàuru di ciuri  
e celu pulitissimu sbiddìa,  
ma lu distinu tortu e trariturì  
l'ascippa di la terra so natia,  
surdu a lu chiantu surdu a lu duluri,  
pi tuttu lu munnazzu li stravià...  
E l'emigranti partunu,  
lassannusi ndarrerì  
un munnu di peni e di pinseri!  
E vannu luntanu luntanu,  
'n cerca di bona furtuna  
pi strati strànii  
assicutànnu sonnura  
vistuti di spiranza!  
Dintra na valiggiàzza di cartuni,  
'n menzu a ddi robbi pisicuti,  
lu restu di ddu nenti,  
ddu picca nicissariu  
pi purtari la cruci  
supra lu Carvariu!  
E l'emigranti partunu  
e sunnu assicutati  
di la scarsizza e li nicissitati!

Partunu alluccunuti,  
cu l'occhi sbarrachiatu,  
sintennusi vinnuti  
di li so stissi frati.  
Partunu ssi mischineddi,  
nudi, nudi comu l'aceddi...  
E 'n terra strània  
s'affucanu di travagghiu  
pi rumpiri pi sempu  
li mmaliditti catìni  
di la malasorti...  
ci ni sunnu tanti  
ca trovanu li porti  
di la fortuna a banidduzza,  
l'òutri vannu avanti  
bistimiannu la sorti  
ca li mmesti e li truzza  
senza dàricci nenti,  
e tra privanzi e stenti,  
nta ddi 'gnuni luntani,  
sfardanu la vita  
pi 'n-tozzu di pani...  
Ma chìsti e chiddi,  
quannu la sira  
vardanu li stiddi,

stènninu li manu  
versu ddu celu stràniu  
e chiancennu abbiluti  
sonnanu, cu l'occhi sbalancati,  
tutti li cosi pirduti...  
E mentri ognunu ntrizza  
miliùna di pinseri  
lu ciàscu di lu cori si sbacanta  
e diventa surgenti  
di duci sentimenti...  
(li soliti pinseri stravacanti  
di tutti l'emigranti...)  
Ognunu d'accussì trova cunortu,  
pensa e s'illudi jornu pi jornu <sup>(1)</sup>  
spirannu di fari ritornu...  
macari doppu mortu!

(1) Si pronuncia: Jornu pi ghiornu (giorno per giorno)

## JORNU PI JORNU

Mi sentu 'u cori vunciu  
e l'arma mia firita,  
è sempi chiù ravusu  
lu pisu di sta vita.  
Haju annacàtu ammatula  
ca testa nta li stiddi  
spiranzi c'un crisceru:  
ristaru picciriddi.  
Jornu pi jornu agghiùttu  
ansia, duluri e scantu,  
la gioja d'un mumentu  
mi costa tantu chiantu.  
Haju addisiatu paci,  
haju addisiatu amuri,  
haju cugghiutu spini  
unni chiantavi ciuri.  
Ma vogghiu siminari  
puru 'n menzu li scogghi  
palori di pirdunu:  
Biatu cu' li cogghi!

## IMMAGINI DI LA SICILIA

Quannu lassati Scilla pi Cariddi  
appena supra st'isula sbarcati  
giuvini, vicchiareddi e picciriddi,  
calativi la testa e la vasati.  
Ricca di latti, meli e di ciuriddi  
sta terra biniritta di li fati  
è comu 'n-paradisu tantu beddu  
d'a Conca d'oru finu a Mungibeddu.  
P'aranci, pi limuna e mandarini  
jiti a Palermu, tanti ci ni sunnu;  
a Trapani trovati li salini,  
li spichi di furmentu ntunnu ntunnu.  
Sunnu a Casteddammari, senza spini,  
li megghiu scuzzulati di lu munnu;  
pi tutta la buntà di la marina  
jiti a Mazara, Sciacca o Empedoclina.  
Pi celu pari sempi primavera,  
lu sulì duci duci v'accarizza  
e Bedduvirdi pari na ciurera  
unni li rosi sunnu na ricchizza.  
Però la genti tinta e sparrittera  
dipinci la Sicilia arritratizza,  
dicinu ca pi nenti ccà si spara  
e parranu di mafia e di lupara.

Ma chi ni sannu chissi di nuàtri  
e di sta terra ginirusa e pìa  
ca ni proteggi come fa na mati  
anchi si ni truvamu a la stranìa?  
Mmiriusi, camurristi, vili e latri  
su' sparsi pi lu munnu 'n ogni via...  
Li siciliani su' travagghiaturi  
e unni vannu portanu l'onuri!